



Gabinete Fronteiras Marítimas
Konsellu ba Delimitasaun Definitiva ba Fronteiras Marítimas
Dili, Timor-Leste
+670 7742 5544
info@gfm.tl

Gabinete Fronteiras Marítimas mak Sekretáriadu ba Konsellu ba Delimitasaun Definitiva ba Fronteiras Marítimas, ne'ebé responsabiliza ba negosiasaun ba fronteiras marítimas ho Indonézia no Austrália.

Timor-Leste no Austrália asina Tratadu Fronteira Marítima ida

Iha loron 6 fulan Marsu tinan 2018, Timor-Leste no Austrália asina Tratadu Fronteira Marítima istóriu ida iha Nasoens Unidas nia Sede iha Nova Iorque. Tratadu Fronteira Marítima ne'e estabesele ba dahuluk fronteiras marítimas permanente entre Timor-Leste no Austrália iha Tasi Timor. Asina tratadu ne'e hakotu prosesu konsiliausaun obrigatória, tuir Nasoens Unidas nia Konvensaun ba Lei Tasi nian, ne'ebé Timor-Leste mak hahú iha fulan Abril tinan 2016. Tratadu ne'e estabesele fronteiras marítimas permanente iha Tasi Timor bazeia ba lei internasional, hodi hakotu Timor-Leste nia disputa naruk kona-ba fronteira marítima ho Austrália. Hodi fó rekoñesimentu ba Timor-Leste ninia direitu ba nia tasi sira, asina Tratadu ne'e marka hakat importante tebes ida ba povu Timoroan iha sira nia luta ba soberania kompleta no independénsia.

Tratadu Fronteira Marítima estabesele liña mediana ida iha Tasi Timor, ho ajustamentu oitoan deit hodi hetan rezultadu ekilatativa ida tuir ezizénsia lei internasional nian. Tuir akordu ne'e, Timor-Leste no Austrália sei fahe Greater Sunrise, ho maioria iha Timor-Leste nia área marítima no maioria husi reseita ne'e sei mai Timor-Leste.

Fronteira marítima ne'ebé konkorda ona ne'e tau kampu rekursu sira uluk iha Área Dezenvolvimentu Petrolíferu Hamutuk (JPDA) iha Timor-Leste nia plataforma kontinental. Ida ne'e katak, la hanesan ho aranjus fahe rekursu sira iha molok ne'e, título ba reseita sira iha futuro husi kampu Bayu-Undan no Kitan sei transfere ba Timor-Leste.

Gabinete Fronteiras Marítimas desenvolve ona fixa informativu ida relaciona ho Tratadu Fronteira Marítima hodi informa ba públiku kona-ba akordu ne'e no nia prosesu tomak. Bele hetan fixa ne'e iha www.gfm.tl

Agora fronteiras marítimas entre Timor-Leste no Austrália rezolve tiha ona, Gabinete Fronteiras Marítimas sei kontinua nia servisu hodi fó apoia ba rezolusaun ida ba fronteiras marítimas entre Timor-Leste no Indonézia, ne'ebé konsistente ho UNCLOS no lei internasional.



Reprezentante ba Timor-Leste iha Konsiliausaun, Ministru Agio Pereira asina Tratadu Fronteira Marítima ho Austrália nia Ministra Negósios Estranjeirus Julie Bishop iha Nasoens Unidas nia Sede, Nova Iorque, iha loron 6 fulan Marsu tinan 2018.

The collage features several brochures with the following titles and content:

- TIMOR-LESTE NIA KONSILIASAUN HO AUSTRÁLIA KONA-BA FRONTEIRAS MARÍTIMAS**: Discusses the 11 April 2018 agreement between Timor-Leste and Australia regarding the maritime boundary in the Timor Sea.
- Saida mak konsiliausaun obrigatória?**: Explains the legal basis for the agreement, specifically the 1978 Convention on the High Seas.
- Saida mak iha sira nia iha konsiliausaun ne'e?**: Details the key provisions of the agreement, including the delimitation of the maritime boundary and the Greater Sunrise field.
- Saida mak sei hahu tur mai?**: Addresses the future of the Greater Sunrise field and the transfer of rights to Timor-Leste.
- Timor-Leste nia Tratadu Fronteira Marítima ho Austrália**: A general overview of the treaty and its significance.
- Saida mak iha Tratadu Fronteira Marítima ne'e?**: Another overview of the treaty's terms and conditions.

The brochures include maps of the Timor Sea and the maritime boundary, as well as logos for the GFM and the UN.

Konseitu dezenvolvimentu no vizita ba konteudu lokal iha rejiaun

Hola parte ba prosesu Komisaun Konsiliaun UNCLOS ne'e, husu para Timor-Leste, atu konsidera konteudu lokal, treinamentu no aspetu dezenvolvimentu nasional ba dezenvolvimentu no explorasaun Greater Sunrise nian. Atu fó assisténsia ba prosesu ne'e, GFM apoia Xefe Negosiador Kay Rala Xanana Gusmão ne'ebé lidera vizita ba planta Gás Natural Likifeitu (LGN) iha Bontang iha Indonézia, no Papua Nova Guiné. Iha vizita ne'e tomak, Xefe Negosiador hasoru malu ho líderes industrial sira, matenek nain sira ne'ebé promove dezenvolvimentu lokal no rejional, kria kampu servisu nasional no treinamentu industrial nian, ho vizaun ida atu haforsa kooperasaun entre nasaun sira no bele komprende no aprende husi sira nia esperiénsia.



Sentru Treinamentu Planta LNG iha Papua Nova Guiné, Dezembru 2017

Konsellu Atlántiku nia Fórum Global kona-ba Enerjia iha Abu Dhabi – fulan Janeiru tinan 2018

Konsellu Atlántiku nia Forum Global kona-ba Enerjia iha Abu Dhabi mak fórum internacional prinsipal ba governu, industria, no líderes sira nia hanoin hodi estabelese ajenda ba enerjia global ba tinan ne'e no antisipa no responde ba mudansa iha mundu enerjia nian.

Halao ho patronajen Sua Eselensia Sheikh Mohammed bin Zayed Al Nahyan, Prínsipe Erdeiru Abu Dhabi no Komandante Supremu Adjuntu Forsas Armadas ba Emiradus Árabes Unidos (EAU) nian, Fórum ne'e halao ho parseria ho Ministériu Enerjia Emiradus Árabes Unidos, ADNOC, no Mubadala.

Timor-Leste nia Xefe Negosiador Kay Rala Xanana Gusmão hetan konvite, atu fó diskursu importante ida iha Fórum ne'e, ko'alia kona-ba "Diversifika Ekonomia iha Rejiaun, Prátika Diak liu no Modelu Negósiu ne'ebé Sustentável: Lisaun sira ne'ebé Timor-Leste aprende ona."

Husi lora 11-14 fulan Janeiru tinan 2018, Xefe Negosiador no delegasaun kiik ida husi Timor-Leste vizita Abu Dhabi hodi partisipa iha Fórum Enerjia Global ne'e no halao reuniaun balu ho líderes prominente EAU nian, jestores Fundu Rikeza Soberania nian, no kompañia mina sira.

Vizita ida ne'e susesu hodi aumenta tan ema nia koñesimentu kona-ba Timor-Leste no nia akordu foun kona-ba fronteira marítima ho Austrália liu husi Nasoens Unidas nia prosesu Konsiliaun Obrigatória no aprende dalan foun no prátika diak sira iha jestaun rikusoim husi fundu soberania rikusoim bo'ot balu iha mundu.



Xefe Negosiador Kay Rala Xanana Gusmão hasoru malu ho Ministru Estadu ba Negósius Estranjeirus ba EAU, Dr. Anwar Gargash.



Xefe Negosiador Kay Rala Xanana Gusmão fó diskursu importante ida iha Konsellu Atlántiku nia Fórum Global kona-ba Enerjia.

Selebrasaun Aniversáriu 42 ba Proklamasaun Independénsia Timor-Leste nian (loron 22-29 fulan Novembru tinan 2017), Covalima

Integradu ho selebrasaun ba aniversáriu 42 ba proklamasaun independénsia Timor-Leste nian, Gabinete Fronteiras Marítimas simu konvite hodi partisipa iha espozisaun ida, husi loron 22-29 fulan Novembru iha Suai, Munisípiu Covalima.

Gabinete Fronteiras Marítimas haruka funsionariu 11 ba espozisaun ne'e, hodi informa ba públiku kona-ba Timor-Leste nia ajenda fronteira marítima nian. Vizitante sira inklui estudante sira, membru comunidade sira, ajente governu nian, diplomata, veteranus, representante NGO sira, militáriu no polísia sira no akadémikus, no seluk tan.

Ema liu husi 1.140, husi tinan no profisaun oin-oin, vizita GFM nia Baraka. Vizitante sira espresa sira nia interese iha kestaun fronteira marítima no haforsa sira nia apoiu ba kestaun nasional ida ne'e, liu-liu husu atu hametin dame no estabilidade iha Timor-Leste, no husu atu ukun nain sira proteje didiak rikusoin hirak ne'ebé Timoran nian ba jersaun sira tuir mai.



Vizitante sira hatudu sira nia interese ba iha kestaun fronteiras marítima no fó apoiu ba kestaun nasional ida ne'e.

Kursu Espesializada iha Fotografia iha Sydney, Austrália

Husi loron 4 – 8 fulan Dezembru, ofisial komunikasaun nain rua husi Gabinete Fronteiras Marítimas atende kursu fotografia ne'ebé haree liu-liu ba téknika hasai foto nian, ne'ebé Sydney Photographic Workshop mak fó.

Kursu ne'e kobre aspetu importante sira husi fotografá nian, inklui atu uza mákina fotografia, téknika ba fókus, hasai fotografia uza manual, sukut naroman, halo dokumentasaun no introdusaun ba fotojornalizmu.

Partesipante ida deskreve esperiensa treinamentu ne'e hanesan "semana ida ne'ebé májika". Kursu ne'ebé iha balansu diak tebes entre teória no prátika ne'e fó ba partisipante sira baze ne'ebé forte hodi hasai fotografá ho kualidade profesional.



Kuriozu nafatin!

Kursu iha Rekursu Umanu no Jestaun ba Profisionais no Ezekutivu sira, iha Jakarta, Indonézia

Husi loron 2 to'o loron 8 fulan Dezembru, ofisial nain tolu husi Gabinete Fronteiras Marítimas partisipa iha kursu "Rekursu Umanu no Jestaun ba Profisionais no Ezekutivus" no "Kompeténsia ba Lideransa no Jestaun" iha Jakarta. Kursu ida ne'e Sentru Formasaun Referénsia, Sentru Spectra, mak fó no promove kompeténsia husi elementus prinsipal sira iha área jestaun no finansas nian.



Ekipa GFM ho Sr. Hendra Kusnoto

Sesaun fahe informasaun husi GFM

GFM kontinua fahe informasaun ba organizasaun sira, comunidade no grupu relijiozu sira no sosiedade sivil kona-ba Timor-Leste nia fronteiras marítimas.

Iha Kuarta-feira, loron 21 fulan Marsu tinan 2018, GFM fahe informasaun ba ekipa husi La'o Hamutuk kona-ba tratadu fronteira marítima entre Timor-Leste no Austrália.



Ekipa La'o Hamutuk no ekipa GFM

GFM halo apresentasaun rua ba UNTL. Ida iha Sexta-feira, loron 30 fulan Marsu ba estudante 65 husi Kursu Koalia Inglés (ECC) no ida seluk iha Kuarta-feira, loron 4 fulan Abril ba estudante 40 husi Departamentu Relasaun Internasional. Estudante sira iha interese tebe-tebes ba iha prosesu konsiliausaun obrigatoria no tratadu ne'ebé hanesan rezultadu husi prosesu ne'e.



GFM fahe informasaun ba estudante sira iha UNTL

Iha Kuarta-feira, loron 28 fulan Marsu, GFM fahe informasaun ba estudante besik 30 no professor balu iha Universidade João Saldanha iha Becora, Díli.

GFM fó apoia ba Xefe Negosiador Kay Rala Xanana Gusmão hodi fahe informasaun ba públiku dala rua kona-ba fronteiras marítimas – ida iha loron 3 fulan Abril ba ema besik 600 iha Salaun Katedral, Vila-Verde no ida seluk iha loron 8 fulan Abril ba estudante besik 2000 iha Sentru Treinamentu Don Bosco iha Díli. Ema hirak ne'ebé atende sesaun sira ne'e iha interese no ativu hodi rona kona-ba fronteiras marítimas no tratadu fronteira marítima ho Austrália ne'e signifika saida ba Timoroan sira.



Xefe Negosiador Kay Rala Xanana Gusmão fahe informasaun ba públiku iha Díli, loron 3 fulan Abril tinan 2018

